

欽
定
全
唐
文

欽定全唐文卷一百二十一目錄

新文藝出版社藏書

漢隱帝

李濤罷相制

誅李崧等詔

誅劉景巖後放免其子行謙等詔

慰諭馬希萼詔

贈劉審交太尉詔

賜郭威平李守貞詔

修飾兩漢陵園勅

金史卷之二十一
定節度使奏薦屬官勅

委長吏親慮囚勅

給復三京勅

修高祖實錄勅

免王松官勅

暑月斷刑勅

決滯獄勅

注擬令錄限年勅

修晉朝實錄勅

宣示冬集人候闕除授勅

詳核增戶添租勅

封錢宏倣爲吳越國王玉冊文

即位大赦文

春令赦文

欽定全唐文卷一百二十一

漢隱帝

帝諱承祐高祖第二子後唐長興二年生乾祐元年二月封周王即皇帝位在位三年年二十周廣順元年追諡曰隱皇帝

李濤罷相制

朕虔承遺訓嗣守鴻基嘗懼眇冲不克負荷所以師臣畏相稽衆從人採沃心造膝之謀詢繼體守成之道其或力非任重才不迨時有玷天工顯貽物議宜從罷免用儆厥

愆開國佐命輔聖功臣光祿大夫行中書侍郎兼戶部尚書同中書門下平章事上柱國隴西縣開國伯食邑七百戶李濤早預朝倫素虧時望繼踐清華之列曾無倜儻之名先皇帝應運開階濟物成務未明求理虛已待賢擢自禁林升之槐路旣委宰衡之任蔑聞帷幄之謀迨及眇躬初親庶政被顧問之際屢覩醺酣當獻替之時無聞詆訐復虧嚴重但務詆誥詎爲君子之儒殊失大臣之體重以梓宮在殯國步多艱屢陳違衆之言頻建出師之議率爾獨見豈是臧謀朕方務含宏冀全終始雖包荒而在念慮

假器以興譏俾輟中樞式存大體仍令還第庶用省躬惟爾自貽無我有怨苟能思過豈吝推恩可罷免勒歸私第

誅李崧等詔

稔惡圖危難逃天網虧忠負義必速神誅李崧頃在前朝最居重位略無裨益遂致滅亡及事契丹又爲親密士民俱憤險佞可知先皇含垢揜瑕推思念舊擢居一品俾列三師不謂潛有包藏謀危社稷散差人使潛結姦凶附近山陵擬爲叛亂按其所告咸已伏辜宜正典章用懲姦逆其李崧李嶼李義一家骨肉及同謀作亂人並從極法

誅劉景巖後放免其子行謙等詔

劉景巖年已衰暮身處退閒曾無止足之心輒肆包藏之
毒結集徒黨窺伺藩垣所賴上將輸忠三軍協力盡除醜
類克殄渠魁其劉景巖次男前德州刺史行琮已行極法
長男渭州刺史行謙孫男邢州馬軍指揮使崇勲特放

慰諭馬希萼詔

所修職貢舊有規程念航深梯險之勞重違卿意在誘善
勸忠之道本實朕心今後凡有進獻可與希廣商量庶叶
雍和不爽體制

贈劉審交太尉詔

朝廷之制皆有舊章牧守卒官比無贈典其或政能殊異
惠及蒸黎生有令名歿留遺愛褒賢獎善豈限彝章可贈
太尉吏部所請宜依

賜郭威平李守貞詔

李守貞頃在前朝驟承委遇迨事先帝復委藩垣效淺功
微寵深位大而狡性難制小器易盈蔑義虧忠窮凶極逆
江海不能流其惡鼎鑊不足快其誅卿憤激於心義形於
色覩茲妖孽志在翦除動息之間必思於經略寢食之際

無忘於寇讎撫士愛人分甘共苦躬臨矢石親冒梯衝揮
戈而蛇豕就誅破竹而金湯失險氛霾既息宗社再安非
我元臣莫隆景運朕之倚愛何止寢興言念辛勤無忘嘉
愧

修飾兩漢陵園勅

我國家肇迹豐沛膺籙并汾蓋承積德之靈再享配天之
業四百年之洪緒一千載之遺風乃祖陵園先時廟貌屬
累朝之隔越諒如在之因循將明追孝之心當盡奉先之
敬天下州府應有兩漢諸帝王陵園廟宇宜令所屬長吏

檢討量加修飾其陵園側近禁止芻牧樵採

定節度使奏薦屬官勅

設官分職朝廷自有規程薦士延才州郡合存體式應諸道節度防禦團練刺史奏薦判官書記支使推官令錄簿尉等親人之官不易入幕之賓尤難必取當仁庶聞幹事守臣奏薦朝廷選除素有明文咸拘定制近年以來除人或虧允當薦士多昧選求體制既踰紊亂滋始遐邇將期於致理奏除宜在乎擇才況有舊章足爲常式其諸道行軍副使兩使判官並不得奏薦委中書門下選除帶使相

節度使許奏節度掌書記觀察支使節度推官不帶使相
節度使只許奏節度掌書記節度推官其防禦團練判官
刺史判官等聽奏仍許精選才能其唐朝晉朝前項條貫
並可舉行永爲規制所奏薦州縣官自有銓衡不可侵越
以勅內舊人數許奏使相三人不帶使相二人防禦團練
刺史一人爲定仍付所司

委長吏親慮囚勅

政貴寬易刑尚哀矜慮滋蔓之生姦實軫傷而是念今屬
三元改候四序履端將冀和平無如獄訟應三京鄴都諸

道州府見繫罪人委逐處長吏躬親慮問其於決斷務在公平但見其情卽爲具獄勿令牽引遂致滯淹無縱舞文有傷和氣

給復三京勅

先以兵甲至多糧儲不給權於苗畝之上遂有紐配之煩雖年歲之頻登諒黎民之艱窘固非獲已深用軫懷今則雨雪及時陽春布澤宜順發生之令特覃優卹之恩冀閭里之安居俾農桑之樂業應三京鄴都諸道州府所徵乾祐元年夏秋苗稅及紐徵白米稈草據今年二月一日已

前已納外見係欠數並宜特放布告遐邇體朕意焉

修高祖實錄勅

載唐虞之盛傳彼古文明得失之由存乎信史恭惟高祖皇帝受天歷數纘漢基圖戎虜蠻夷懾靈旗而內附禮樂征伐建王道於大中功格於上元化行於率土將欲示其軌範約彼春秋接高光紀聖之書續班馬記言之典廢而不舉闕孰甚焉左諫議大夫賈緯左拾遺竇儼右拾遺王伸等才學淵深論辯鋒起分職方提於直筆編年允屬於鴻儒宜令緯等同修高祖實錄呈進仍令宰臣蘇逢吉監

修

免王松官勅

松事因有玷誠切上章述避嫌之辭形告退之意其男仁寶雖因除名曾受僞官一昨旣翦兇酋合從俘執未明死所乃漏刑書路歧難限于山河情愛且關於父子便議連坐恐失寬條以爾朝列舊臣班行宿德累有退閒之請宜引軫惻之恩特俾免官用明減等宜停見任

暑月斷刑勅

月戒正陽候當小暑乃挺重出輕之日是恤刑議獄之辰

有罪者速就勘窮薄罰者畫時疏決用符時令勿縱滯淹
三京鄴都諸道州府在獄見繫罪人宜令所司疾速斷遣
無致淹滯枉濫

決滯獄勅

王化所先獄訟攸切不惟枉撓兼慮滯淹適當長養之時
正屬煇蒸之候累行條貫俾速施行靡不丁寧未曾奏報
再頒告諭無或因循應三京鄴都諸道州府詔至宜具疏
放已行未行申奏無致逗留

注擬令錄限年勅

令錄之任責辦非輕用捨之間尤宜適中少小者未曾履
歷則爲政必疏衰晚者已及耄期則臨民多廢須期慎選
以擢吏能起今後諸色選人年及七十者並宜注優散官
年少未歷資考者不得任縣令

修晉朝實錄勅

五運相承歷代而猶傳鳳紀百王垂訓繼明而具載鴻猷
況今司契御乾握圖纂極事每循於師古政必究於化源
迨自金行成茲火德所請編錄庶補闕文其晉朝實錄宜
令監修國史蘇逢吉與史官賈緯竇儼王仲等修撰呈進

宣示冬集人候闕除授勅

中書奏前資朝官近日併於中書陳狀稱準宣命指揮自
外地發遣相次到京正當冬寒未有員闕既難淹泊須議
指揮其前資文武兩班朝官等只宜於西京及闕下任便
安居候闕除授宜令御史臺曉示

詳核增戶添租勅

親人之任務在安民經國之規必資徵賦至於招添戶口
增長稅租減選加階優有處分勸能行賞顯降勅文邇來
論課績者甚多較虛實則未當外州批上厯子南曹磨勘

解縣空收招到編民莫見新添稅額蓋有析居耕種各立戶名或是避稅逃移併未歸業所以虛添農戶無益官租考課涉名未盡其善宜兼吏部南曹自今後及已前應有令佐招添點檢出戶口據數須本處戶合徵稅賦物數目於解縣厯子內一一開坐批書方得準天福八年三月十日勅條施行如不合前後勅例不在施行之限

封錢宏俶爲吳越國王玉冊文

惟乾祐二年歲次己酉十月庚午朔十九日戊子皇帝若曰我先帝順天致罰大拯黎元享萬靈於無主解兆庶之

倒懸較定世勲以吳越居右伊朕眇末虔奉先訓嗣位之
始即疇懋功前命爲元帥按地圖授武節東南之境得行
征伐今冊爲真王駕大輅執桓圭牛斗之鄉盡荒土宇詢
於有位僉曰克諧咨爾匡聖廣運同德保定功臣東南面
兵馬都元帥鎮海鎮東等軍節度使浙江東西等道管內
觀察處置兼兩浙鹽鐵制置發運營田等使開府儀同三
司檢校太師兼中書令杭州越州大都督上柱國吳越國
王食邑一萬戶實封一千戶錢宏俶象緯炳靈公王襲慶
橫江負海者三千里開國承家者六十年而能望辰極以

駿奔奉天朝之師律充庭納貢則外府告盈下瀨宣威則
前茅獻捷忠信著於羣后禮讓行於一方故元冕九章爲
王之服昭其名也朱輪駟馬爲王之馭昭其器也而又三
吳百越列土分疆有民人焉有社稷焉恢祖禰之令圖實
典禮之鉅著勸夫忠孝以御邦家今遣正議大夫守右散
騎常侍上柱國賜紫金魚袋張煦左補闕崔頌持節備禮
冊爾爲吳越國王嗚呼品秩甚尊名數尤重肅廣庭而備
物練吉日以覃恩爾其正厥位事大以敬教民以順馭衆
以恩神其福之禮曰惟王建國諸侯所以守舊邦書曰惟

帝念功王者於是出好爵匡我堯緒永爲漢藩浙江如帶
稽山如礪福祿無窮貽厥百世汝往欽哉對揚我休命

即位大赦文

古先哲王繼天御物必有大造被於生民故能流餘慶於
子孫保永圖於宗社我國家本惟堯之洪緒襲有漢之耿
光歷數有歸謳歌所屬先帝乘時出震應運開圖爰在初
潛適丁難否妖孽盜居於宮闕腥膻肆毒於寰區血肉黔
黎荆榛赤縣繇是建靈旗而指敵仗黃鉞以誓師逐逋寇
於龍荒救含生於虎口遺身利物功德契於三靈以欲從

人潤澤流於八表大統既集仙馭俄遷號慕終天殞越無
地肆予小子獲慕丕基上承顧命之嚴下迫羣臣之請遺
弓如昨仍几具存瞻黼展以椎心處苦廬而瀝血而文武
庶尹將相大臣連上封章請臨政事固拒雖切敦勸彌堅
蓋負荷於眇躬復祗膺於永命諒難固執須強荒羸恭已
視朝載惟感咽向明而治始聽斷於萬幾作解之恩宜昭
宣於四海可大赦天下取二月十三日昧爽以前所犯罪
有已結正未結正已發覺未發覺罪無輕重常赦所不原
者咸赦除之諸左降官未量移者與量移已量移者與復

資已復資者與敘用應諸有盜賊處宜準今年正月五日所降恩赦放罪招攜宜令所在長吏更切曉諭招喚各令歸業安家營養並不問以前違犯仍倍加安撫文武臣寮侍衛將士赤心爲國勦力勤王盡節盡忠同心同德輔翊先帝推戴沖人言報忠勞宜伸渥澤應中外文武臣寮將吏各加恩寵其馬步諸軍將兵士等各賜賞給已從別勅處分尚念國家多事帑藏尚虛賜賚未優良深愧意兵火之後災沴相仍編戶傷殘比屋貧弊重以科徭未息輸斂不時言念瘡痍宜伸蠲復天福十二年終已前殘欠秋夏

稅賦及和糴沿徵一物已上並特放所有徧經災沴處開封府滑曹鄆宋毫單潁徐宿兗沂密孟鄭懷衛澶濮等州並濮城四面三十里內共二十處除已放去年殘稅外宜更加軫卹其今年夏麥苗子於舊額上特與放免一半頃經戎虜所在驚騷於場院課程州府管係既有陷失宜示矜蠲應州府縣鎮遭契丹草寇及軍都更變驚却兼有般送綱運已離本處沿路遭劫奪諸色錢帛一物已上兼天福十二年六月終已前諸州府鹽麴商稅鐵冶不敷課利及主持錢物糧草柴蒿敗闕欠折等一切特與除放其主

事人員亦放罪其有契丹犯闕之時諸州府有危疑之處分差兵士守把城池逐急將係省錢物充兵士優給犒設諸道州府有去年六月終已前全分支却將士春冬衣賜及諸色諸受自來累行徵納者並與檢驗除破先是諸州府被契丹率配到錢物逐處差人管押送納有欠折者勘驗指實並與除破天福十二年六月終已前逐處收刈到芟草積年損爛及欠少處並令除放孝治之道不獨其親況推許國之忠俱享承家之慶感霜露者宜覃漏澤奉晨昏者亦示寵章立身揚名於斯爲美在朝文武臣僚內諸

司使及侍衛諸軍都虞候已上諸道節度防禦團練刺史並見任節度副使行軍司馬藩方馬步軍都指揮使父母祖父母見存者並與加恩亡歿者並與追贈追封已追封追贈者更封贈禮稱助祭詩美作賓誠歷代之嘉猷蓋近朝之闕典興衰繼絕宜舉舊章其唐晉兩朝可求訪子孫仍立爲二王後州縣之職朝廷命官旣曠事者有懲豈奉公者無勸諸處令錄主簿在任顯有殊績善於勸課招輯徵科靜辦者委所在具以名聞當加優獎仍以時經多事民未小康每念疲羸倍懷軫惻天下州縣戶口除宣省指

揮外不得妄有科配徭役如合充色役者並須定奪允當
其力及大戶並不得諸處投名影占稍違科條當舉憲典
古者慮政教之紕繆詢理道於芻蕘蓋欲使外事不壅於
中下情得通於上言路既廣頌聲則聞況在續承之初實
繫忠讜之說內外臣寮如有所見便於時政者可直言得
失無所隱任賢勿二得士者昌仰稽聖謨敷求時彥訪諸
貞遁庶無遺才天下有賢良方正文才武略不求進達處
於沈滯者仰所在搜訪以聞名實相符當加擢任於戲建
邦撫運念創業之惟難繼統承基知守文之不易續紹惟

重憂思匪寧所賴列辟宗臣元勲舊德股肱王室保佑朕躬共致扶持庶無失墜爰覃霈澤用洽中區凡在照臨當體予意

春令赦文

朕以眇躬獲纘洪緒念守器承祧之重懷臨深履薄之憂屬以元道猶艱王室多故天降重戾國有大喪奸臣樂禍以圖危羣寇幸災而伺隙力役未息兵革方殷朕所以嘗膽臥薪廢食輟寢雖居億兆之上不以九五爲尊漸冀承平永安遐邇內則稟太后之慈訓外則仗多士之忠勲股

肱叶謀爪牙宣力西摧三叛撫其背而扼其喉北挫羣蕃
斷其臂而折其脊次則巴邛嘯聚淮海猖狂纔聞矢接鋒
交已見山摧岸沮寇難少息師徒無虧兼以修奉園陵崇
建宗廟右賢左戚同寅協恭多事之辰大禮無闕負荷斯
重哀感良深今三陽布和四序更始宜申兌澤允答天休
恤獄緩刑捨過宥罪當萬物之孚甲開三面之網羅順彼
發生以召和氣應乾祐二年正月一日昧爽已前天下見
繫罪人除十惡五逆官典犯賊合造毒藥劫家殺人賊黨
正身外其餘犯人及關連者並放如河中李守貞鳳翔王

景崇永興趙思綰等比與國家素無讎釁偶因疑懼遂致
叛違所以命將陳師徵辭問罪止期旦夕必見功收然以
彼之提封朕之黎庶久陷孤壘可念非辜易子析骸填溝
委壑爲人父母寧不軫傷但以屈已愛人先王厚德包荒
含垢列聖美談宜宏濟物之恩用廣好生之道其李守貞
王景崇趙思綰等宜令逐處都部署分明曉諭若能翻然
歸順朕並待之如初當保始終享其富貴明申信誓固無
改移其或不認推誠堅欲拒命便可應時攻擊剋日盪平
候收復城池罪止元惡其餘誣誤一切不問仍預告諸軍

破城日不可殺人放火諸處草寇等拋棄耕農聚集林藪
晝伏夜動害物殘人前後累令翦除繼行招諭尚恐疑懼
特示寬恩如能改過知非出來陳首者應已前所有爲非
一切不問宜令逐處節度刺史及巡檢使明行曉示宜達
朝廷恩旨冀其歸業常切撫安不得信任節級所繇衷私
怨慟重念征討已來勞役尤甚兵猶在野民未息肩急賦
繁徵財殫力匱矜恤之澤未被於疲羸愁歎之聲幾盈於
道路尚以軍旅未息帑廩無餘猶稽蠲復之恩空懷愧憫
之意即候邊烽少弭國患漸除當議優饒冀獲蘇息諸道

藩侯郡守等咸分寄任共體憂勞更宜念彼瘡痍倍加勤
卹究鄉閭之疾苦去州縣之煩苛勸課耕桑省察冤濫共
恢政理用副憂勤凡百臣僚當體朕意

欽定全唐文卷一百二十二目錄

周太祖一

監國教

贈趙瑩太傅制

追冊故夫人柴氏爲皇后制

追封乳母楚國太夫人制

貶寶州刺史張建武制

求言詔

却諸道貢物詔

諭徐州軍民詔

賜王彥超詔

獎隰州刺史許遷破敵詔

賜蘇逢吉劉銖家屬莊宅詔

賜高保融詔

赦潞州俘馘詔

收復徐州詔

許淮南糴易詔

允皇子榮請放免散戶詔

賜昭義節度使常思詔

答宰臣王峻詔

賜慕容彥超詔

改定刑法詔

諭李穀扶疾視事詔

親喪未葬不準選舉詔

答馮道等上尊號詔

賜劉言詔

令三京及諸道勸課農桑詔

定抽稅蕃漢糶鹽詔

命諸州恤刑詔

諭彰義軍民吏詔

命魚崇諒復位詔

欽定全唐文卷一百二十二

周太祖

帝姓郭氏諱威字文仲邢州堯山人唐天祐元年生歷事
後唐晉漢漢乾祐三年授鄴都留守兼樞密使監國廣順
元年正月受漢太后冊即皇帝位顯德元年加尊號聖明
文武仁德皇帝在位四年年五十一諡曰聖神恭肅文武
孝皇帝廟號太祖

監國教

寡人出自軍戎本無德望因緣際會叨竊寵靈高祖皇帝

甫在經綸待之心腹泊登大位尋付重權當顧命之時受
忍死之寄與諸勲舊輔立嗣君旋屬三叛連衡四郊多壘
謬膺朝旨委以專征兼守重藩俾當勅敵敢不橫身勦力
竭節盡心冀肅靜於疆場用保安於宗社不謂奸邪搆亂
將相連誅偶脫鋒鏃克平患難志安劉氏願報漢恩推擇
長君以紹丕構遂奏太后請立徐州相公奉迎已在於道
途行李未及於都輦尋以北面事急寇騎深侵遂領師徒
徑往掩襲行次近鎮已渡洪河十二月二十日將登澶州
軍情忽變旌旗倒指喊叫連天引袂牽襟迫請爲主環繞

而逃避無所紛紜而逼脅愈堅頃刻之間安危莫保事不獲已須至徇從於是馬步諸軍擁至京闕今奉太后誥旨以時運艱危機務難曠俾令監國遜避無由僣俛遵承夙夜憂愧

贈趙瑩太傅制

禮云利祿先死者而後生者則民不悖先亡者而後存者則民可以託聖人垂訓與我同心因嗟旣歿之賢俾舉追崇之典晉故中書令趙瑩行高言善性達心平鼎號函牛斯爲重器劔稱斬馬可謂靈鋒遺清白於子孫行忠信於

蠻貊斷魂外境歸骨中華於是盡傷載深軫悼俾贈三師
之秩以伸一去之悲可贈太傅

追冊故夫人柴氏爲皇后制

義之深無先於作配禮之重莫大於追崇朕當宁載思撫
存懷舊河洲令德猶傳苜蓿之詩媯汭大名不及珩璜之
貴俾盛副笄之禮以申求劍之情故夫人柴氏代籍胎芳
湘靈集慶體柔儀而陳闕翟芬若椒蘭持貞操以選中璫
譽光圖史懿範尚留於閨閫昌言有助於箴規深惟望氣
之艱彌歎藏舟之速將開寶祚俄謝璧臺宜正號於軒宮

俾耀潛於坤象可追命爲皇后仍令所司定諡備禮冊命
追封乳母楚國太夫人制

敦敘九族紉綏六親生者錫其寵臨歿者優其追贈哲王
茂典歷代芳規故南陽郡韓氏婉淑居貞賢明垂範奉嬪
率禮興家道於仁孝之基諸母推恩撫朕躬於幼沖之歲
朝露溘先而奚速慶雲華蔭以彌高宜洽明恩追崇大國
式是載揚之美寧攄欲報之情庶俾後昆永覃清懿噫嘻
貞魄享此儀章可追封楚國太夫人

貶寶州刺史張建武制

頃以野雞蕃族蝨賊邊陲俾爾率領兵師於彼進討殺牛
族熟戶素不陸梁而無故侵騷致其鬪敵彼戎旣然殺戮
去者寧不夷傷俾將士罹殃職爾之罪授之散秩猶爲寬
恩爾當再三深自咎責可行左司禦率府副率

求言詔

朕昔在側微罔親敦學但明軍旅之事安知王化之基而
天命眷求神器自至涉道斯淺何德以堪爰念得之惟艱
未若守之不易况承敝之後致理尤難蒼生未得息肩賢
者尚多鉗口必欲使下情上達上情下通聞所未聞見所

未見莫若開其言路詢於廷臣冀時政之得失必論君道之否臧必告自然昏蒙漸滌聽覽有資致於日新其在封事如聞累朝舊制成令轉對上書百辟相循五日爲準然或權臣惜短時主多猜不敢深切爲言恐以傷觸獲戾至有搜羅鄙事蔓延虛辭徒牽率以爲勞於裨補而何取朕猥惟涼德肇啟丕圖矻矻覽於萬機未能廣其庶績兢兢念於百姓何以致之小康寅畏以居思慮爲疾實賴黎獻誨以讜言一則究邦國之規模一則觀卿士之才器且採縉紳之議不亦愈於芻蕘之詞詢賢哲之謀不亦愈於工

瞽之諫應在朝文武百寮凡有所見益國利民之事並可實封而奏請閣門進納即不可尚習餘風更循舊轍無益於理者勿說不濟於時者勿書縱使指朕之非攻朕之短自當改過不吝豈但從諫如流如或武班中有出自戰功不親儒墨苟有殊見安得惜言固可假手直書豈在屬文麗藻至於藩侯郡牧當切務於安時蠹於政者必知利於民者必曉但關宏益悉可敷聞朕今諭此至懷固非掠其虛美志在得畫一之道成可久之規濟濟英翹無辭貢直事有短者不責理有長者必行但存輔翼之心勿以逆鱗

爲懼咸在中外宜副朕心

却諸道貢物詔

朕以眇末之身託王公之上深懼弗類撫躬靡遑豈可化未及人而過自奉養道未方古而不知節量與其耗費以勞人曷若儉約而克已昨者所頒赦令已述至懷宮闈服御之所須悉從減損珍巧織竒之厥貢並使寢停尚有未該再宜條舉應天下州縣舊貢滋味食饌之物所宜除減其兩浙進細酒海味薑瓜湖南枕子茶乳糖白沙糖橄欖子鎮州高公米水梨易定粟子河東白杜梨米粉菜豆粉

玉屑粃子麪永興玉田紅花秔米新大麥麪興平蘇小粟
子華州麝香羚羊角熊膽獺肝朱柿熊白河中樹紅棗五
味子輕錫同州石鏃餅晉絳葡萄黃消梨陝府鳳棲梨襄
州紫薑新筍橘子安州折粳米糟味青州水梨河陽諸雜
菓子許州御李子鄭州新筍鶯梨懷州寒食杏仁申州蘘
荷亳州草薺沿淮州郡淮白魚如聞此等之物雖皆出於
土產亦有取於民家未免勞煩率多糜費至時奔迫以來
獻逐歲收斂以爲常所奉止於朕躬所損被於甿庶加之
力役負荷馳驅道途積於有司之中甚爲無用之物此而

不止孰曰知微其常貢上件物色今後並不許進奉諸州府更有舊例所進食味其未該者宜奏取進止此外猶有數處時新之物不敢全罷蓋或奉於太后薦於祖宗苟至悉除恐隳常敬告於中外宜副朕心

諭徐州軍民詔

朕昨迫於軍情遂臨帝位已曾示諭想備聞知汝等初得耗音爭無疑懼一則顧身擐甲閉關須至如是今覽汝等報姚武文字備悉心誠況汝等始則爲使主竭忠終則向朝廷順命秉持甚善節義可嘉佇俟旌褒何煩憂懼近者

已有勅旨汝等並授郡符只候新節度使入州即便施行
恩命朕當示信於天下汝宜諭旨於城中凡在軍民各宜
安堵其諸元從職員並宜安撫

賜王彥超詔

昨以鞏廷美楊溫等妄抱憂疑輒敢違拒累令招諭未體
誠懷須至加兵以安民衆切慮破城之後玉石難分卿可
告諭諸軍勿令殺人放火但誅惡黨宜捨脅從眷惟許國
之心當體好生之意

獎隰州刺史許遷破敵詔

凶狂烏合來犯軍城醜類蜂屯罔識天命汝誓平國蠹固
彼人心率驍銳以前衝履鋒鏃而直進機籌神助部伍風
生僞將活擒殘妖碎首心堅鐵石城固金湯蛇豕旣殲梯
衝並熬孽豎偷生而遁迹雄師賈勇以追奔言念忠貞實
無倫比嘉賞愧歎再三不忘

賜蘇逢吉劉銖家屬莊宅詔

故蘇逢吉劉銖頃在漢朝與朕同事朕自平禍亂不念仇
讎尋示優宏與全家屬尚以幼稚無託衣食是艱將行矜
卹之恩俾獲生存之路報怨以德非我負人賜逢吉骨肉

洛京莊宅各一賜劉銖骨肉陝州莊宅各一

賜高保融詔

安審琦奏湖南船綱行監押節級官健四百九人在襄州朕以武陵長沙尋戈結釁既道塗而梗澀致官健以淹留卿義在卹鄰志惟體國俾歸途而無滯副軫念以在茲已降宣命下襄州取逐人便穩如願歸本道者即差人管押至荆南候到卿可差人部送至湖南

赦潞州俘馘詔

卿摧敵有方執俘甚衆據茲惡黨固有常刑但念彼之賊

軍悉是朕之赤子遭罹凶暴迫脅征行以至就擒良亦可憫察其情狀爭忍加誅配於邊遐亦所不欲其賊軍並以釋罪各與衫袴巾履遣供奉官張誣管押至河東界首放歸本家諒卿明敏當體朕懷

收復徐州詔

逆首楊溫及親近徒黨並處斬其餘無名目人及本城軍都將校職掌吏民等雖被脅從本非同惡並釋放兼知自前楊溫招喚草賊同力守把朕以村墅小民偶被扇誘念其庸賤特與含容其招入城草賊並放歸農仍倍加安撫

湘陰公夫人並骨肉在彼仰差人安撫守護勿令驚恐

許淮南糴易詔

淮南雖是殊邦未通中國近聞歉食深所軫懷天災流行
分野代有苟或閉糴是豈愛人彼之生靈與此何異宜申
惻隱用濟餽糧宜令沿淮州縣渡口鎮鋪不得止淮南人
糴易

允皇子榮請放免散戶詔

卿作鎮王畿留心政道雖米鹽細務不懈於躬親而會斂
無名盡思於蠲放能惠窮困深協眷懷已降宣命指揮使

並放爲散戶

賜昭義節度使常思詔

朕以君臣之道則外有朝廷之儀骨肉之親則內有少長之敬且朕與卿當夙昔之共事實敦敘於周親安可此時使渝曩分卿執恭爲行瀝懇上章雖謙謙之道可嘉而親親之義難替家人之禮朕當必行

答宰臣王峻詔

朕生長軍戎勤勞南北雖用心於鈐匱且無暇於詩書世務時艱粗經閱歷前言往行未甚討尋卿有佐命立國之

勲居代天調鼎之任恒慮眇德未及古人於是采掇箴規
弼諧寡昧披文閱理懌意怡神究爲君治國之源審修已
御人之要帝王之道盡在於茲辭翰俱高珠寶何貴再三
省覽深用愧嘉其所進圖已令於行坐處張懸所冀出入
看讀用爲鑒戒

賜慕容彥超詔

朕與卿久敘兄弟比無嫌隙自前歲奔逃之後尋時慰納
如初察憂疑則推以赤心邀信誓則指之白日留男不歸
大職欲已只在舊藩動必依從斷無疑阻何故執心不定

率意而行聚草寇於城中修戰具於衙內發言不遜舉事無常差遣元隨主持鎮務恣令殘害任便誅求率配之名三四十件搶拾事力贍養奸凶一境生靈不勝其苦南則結連淮寇北則勾喚劉崇早者差都押牙鄭麟口奏敷陳乞移藩閫朕推心嘉納回詔允俞昨上表請赴闕廷朕亦一從卿意復成欺侮翻有指名兼更偽詐鄆州書題點染齊王勲德且非奇計何必如斯近者東面諸侯相繼奏報稱卿差點管內人戶團併義營欲議發軍攻取鄰道衆情不服闔境波逃其百姓皆併力同心殺却元隨鎮將例各

將家迴避散投外界潛藏或則保聚山林就便構置寨柵
懼卿挾讐屠害不保朝昏懸望官軍救護爲主朕爲人父
母能不痛心弔伐之行蓋不獲已今差侍衛步軍都指揮
使曹英等部領馬步大軍問卿情狀卿若能改心知過束
身歸朝當許全生待之如舊朕或違信是謂自欺卿若拒
張便令攻取今更飛此詔始末指陳冀卿靜慮深思庶幾
轉禍爲福言盡於此卿其圖之

改定刑法詔

赦書節文明有釐革切慮邊城遠郡未得審詳宜更申明

免至差誤其盜賊若是強盜並準自來格條斷遣其犯竊盜者計贓絹滿三匹已上者並集衆決殺其絹以本處上估價爲定不滿三匹者等第決斷應有夫婦人被強姦者男子決殺婦人不坐其犯和姦者並準律科斷罪不至死其餘姦私罪犯準格律處分應諸色罪人除謀反大逆外其餘並不得誅殺骨肉籍沒家產

諭李穀扶疾視事詔

卿方秉國鈞實藉維持之效復兼邦計最爲繁劇之司稍失區分便成壅滯雖近有傷損未復痊平宜彊扶持且就

臨泣無妨卧理仍放朝參勉卿忍苦之誠副我仰成之意
親喪未葬不準選舉詔

古者立封樹之制定喪葬之期著在典經是爲名教洎乎
世俗衰薄風化陵遲親歿而多闕送終身後而便爲無主
或羈束於仕宦或拘忌於陰陽旅櫬不歸遺骸何託但以
先王垂訓孝子因心非以厚葬爲賢只以稱家爲禮掃地
而祭尚可以告虔負土成墳所貴乎盡力宜頒條令用警
因循庶使九原絕抱恨之魂千古無不歸之骨應內外職
官及選人等今後有父母祖父母亡歿未經遷葬其主家

之長不得輒求仕進所由司亦不得申舉解送如是卑幼在下者不在此限其合赴舉選者或是葬事禮畢或是卑幼在下勒於所納家狀內具言不得罔冒宜令御史臺及逐處長吏本司長官所由司覺察申舉其中有兵戈阻滯或是朝廷特恩除拜起復追徵及內外管軍職員皆以金革從事並不拘此例

答馮道等上尊號詔

眇覲前王德之盛者或弦弧剡矢去天下之暴或手胼足胝服四載之勤德普施於民而民不知其力蓋爲而不有

建之若偷巍巍聖功曾無稱號苟異於是孰不近名朕歷
數在躬艱難承統莫識三皇之道徒知萬乘之尊至於翼
翼小心孜孜庶政推誠待物損已益人上帝佑予於茲三
祀日慎一日無德可稱夫五禮交修四時不忒振頽綱於
會府致函夏之小康斯乃公輔庶臣舉職之明效也七德
訓戎四鄙不聳執干戈而衛社撫封域以安民此又勲臣
將校爲時而宣力也至若蟲螟消殄風雨不愆歲被豐登
民躋富壽茲乃乾坤育物宗社貽庥敢貪天功以爲己力
而公卿叶議中外同詞詣闕拜章贈予美號雖爲臣之義

將順則然諒愛君之心殊不在此朕顧寡薄非所宜當即斷來章無至固執所請宜不允

賜劉言詔

卿卓立功勲明彰臣節復馬氏所亡之地安楚人仍舊之邦一境土疆方資節制大朝藩屏殊切倚毗凡於錫賜之恩皆獎削平之效惟卿敏達知朕睠懷今賜卿舊屬湖南在京及諸處莊宅樓店邸務舍屋等

令三京及諸道勸課農桑詔

宜令三京及諸道州府委長吏指揮管內人戶勉勤耕稼

廣闢田疇勿使蒿萊有廢膏腴之地務添桑棗用資種養
之方仍令常切撫綏不得輒加科役所貴野無曠土廬有
環桑致穀帛以豐盈遂蒸黎之蘇息

定抽稅蕃漢糴鹽詔

青白池務素有定規祇自近年頗乖循守比來青鹽一石
抽稅錢八百文足陌鹽一斗白鹽一石抽稅錢五百文鹽
五升其後青鹽一石抽錢一千鹽一斗訪聞改法已來不
便商販蕃人漢戶求利艱難宜與優饒庶令存濟今後每
青鹽一石依舊抽稅錢八百文以八十五爲陌鹽一斗白

鹽一石抽稅五百鹽五升此外更不得別有邀求蕃人入
界本州務及諸巡鎮倍加安撫不得侵欺如蕃人將羊馬
貨價須平和交易不得縱任牙人通同脫略故爲抑凌訪
聞邊上鎮鋪於蕃漢戶人市易糴餘衷私抽稅今後一切
止絕如違必加深罪各令知悉

命諸州恤刑詔

朕以敷政之勤惟刑是重旣未能化人於無罪則不可爲
上而失刑況時當長羸事貴清適念囹圄之閉固復桎梏
之拘縻處於炎蒸何異焚灼在州及所屬刑獄見繫罪人

卿可躬親錄問省略區分於入務不行者令俟務開繫有理須伸者速期疏決俾皆平允無至滯淹又以獄吏逞任情之姦囚人被非法之苦宜令加簡察勿縱侵欺當令淨掃獄房洗刷枷匣知其饑渴供與水漿有病者聽骨肉看承無主者遣醫工救療勿令非理致斃以至和氣有傷卿忠幹分憂仁明涖事必能奉詔體我用心睦委於茲興寐無已餘從勅命處分

諭彰義軍民吏詔

朕以史懿自鎮邊蕃克勤王事眷言勲舊深副倚毗爰自

近年多嬰疾苦邇來頻有發動乞赴闕尋醫既覽奏陳須
議俞允已差客省使楊廷章往彼知軍州事即令史懿發
來京師朕念涇州久夾疑瘡痍之地軍人百姓撫愛皆同
今已指揮楊廷章候到日凡事倍加撫安不得輒有科率
俾令衆庶皆遂蘇舒

命魚崇諒復位詔

卿向以母親高年久嬰疾恙解職歸止徇意承顏始於疾
辭今聞疾愈臻此康寧之福由其感應之誠苟徵命以猶
稽則才能而虛滯復乃職位式佇論思載覽表章尚形眷

金
三
戀諭以前詔俾之侍行子道旣以光揚君恩亦須承順速
宜祇赴無或再三